

## HUTBA O MUHAMEDU, A.S., KROZ KUR'AN

Hvala Allahu, dž.š., donosimo salavat i selam Njegovom poslaniku Muhamedu, s.a.v.s.

Draga braćo!

Nalazimo se u mjesecu rebiu-l-evvelu, mjesecu u kojem se rodio posljednji Božiji poslanik Muhamed, a.s. Tokom ovog mjeseca puno ćemo govoriti Poslaniku, a.s., učiti mevlude i prirediti veliki broj drugih sadržaja.

Na početku današnje hutbe navodimo nekoliko kur`anskih ajeta koji govore o najodabranijem među poslanicima i općenito najboljem čovjeku, koji je ikad živio.

**„O Vjerovjesniče, poslali smo te, uistinu, svjedokom, navjestiteljem i opominjačem, te pozivateljem Bogu, s Njegovim dopuštenjem, i svjetiljkom koja obasjava. I najavi vjernicima da im pripada od Boga milost velika.“** (El-Ahzab, 45-47. ajet)

**„Poslali smo te kao navjestitelja i opominjača svim ljudima, ali većina ljudi ne zna.“**  
(Sebe, 28. ajet)

**„Uistinu, poslali smo vam poslanika da bude svjedok nad vama, isto kao što smo poslali i Faraonu poslanika.“** (El-Muzzemmil, 15. ajet)

**„Zar je ljudima čudno što smo jednom čovjeku između njih nadahnuli: *Upozori sve ljude, ali onima koji vjeruju navijesti da je njihovo vjerovanje već potvrđeno kod njihova Gospodara!* Nevernici govore: *Ovo je, doista, jedan očigledni čarobnjak.*“** (Junus, 2. ajet)

**„Vama je došao jedan poslanik između vas, koji je blag i milostiv, i njemu vaše nedaće teško padaju, a i jako mu je stalo da budete vjernici. Međutim, ako se oni na drugu stranu okrenu, ti reci: Meni je dovoljan Bog, osim kojega božanstva nema! Na Njega se ja oslanjam, i On je Gospodar Veličanstvenog prijestolja!“** (Et-Tevba, 128-129. ajet)

**„Bog je darovao vjernike šaljući im poslanika između njih, da im kazuje Njegove ajete, te da ih očisti i pouči Knjizi i mudrosti, jer su ranije očito bili u zabludi.“** (Alu Imran, 164. ajet)

**„Zaista, Bog i Njegovi meleki blagosivljaju Vjerovjesnika. O vi, koji vjerujete, blagosivljajte ga i vi i toplo ga pozdravljajte! One koji vrijeđaju Boga i Njegova Poslanika Bog će prokleti i na ovom i na onom svijetu, i pripremio im je ponižavajuću kaznu.“** (El-Ahzab, 56-57. ajet)

**„U Božijem Poslaniku, sigurno, imate dobar primjer da se ugledate – onaj ko za Boga i onaj svijet nadu vezuje i često Boga spominje.“** (El-Ahzab, 21. ajet)

Pregled ovih kura`anskih ajeta završili smo ajetom koji govori o Poslaniku, a.s., kao uzoru.

A da bi nam Poslanik, a.s., bi uzor potrebno je da ga upoznamo.

Zato tokom ovog mjeseca i ne samo ovog, treba da što više čitamo i razmišljamo o životu Muhameda, a.s.

Spomenimo ovdje i hadis u kojem je Poslanik, a.s., rekao:

**„Poslan sam da upotpunim ljudsko ponašanje.“**

Želimo li i mi upotpuniti naše ponašanje, onda je potrebno da zavirimo u sve dijelove života Muhameda, a.s., jer u tom životu postoje primjeri za sve.

Podjednako je važno da upoznamo Muhameda, a.s, kao dijete i njegov boravak na dojenju kod hazreti Halime, kao i doba kad se razvija u mladića za primjer, nazvanog el-emin (pouzdan).

Iz života Muhameda, a.s., učimo kako se treba ponašati prema životinjama, a kakav treba biti u trgovanju.

Muhamed, a.s., nas uči kakav odnos treba da imamo prema svom bračnom drugu, te kako se odnositi prema svom susjedu.

Konačno, Muhamed, a.s., je pokazao kakav treba biti vjerski lider, a kakav kao državnik.

U svemu je Poslanik, a.s, bio najbolji mogući primjer.

Ovu hutbu završavamo dovom Allahu, dž.š., da nam omili razmišljanje o Muhamedu, a.s., da što više čitamo o njegovom životu, kako bi on, uistinu, postao naš jedini pravi uzor.

Amin!

Idriz-ef. Karaman,  
Malmö, 16.11.2018.